

第二二二册

明倫彙編

皇極典

帝紀部

(卷)
三十四

古今圖書集成

中華書局影印



古今圖書集成

卷一百一十五

欽定古今圖書集成明倫彙編皇極典

第十三卷目錄

帝紀部彙考七

漢三

景帝

武帝

皇極典第十三卷

帝紀部彙考七

漢三

景帝本紀

按史記景帝本紀孝景皇帝者孝文之中子也母竇太后孝文在代時前后有三男及竇太后得幸前后死及三子更死故孝景得立元年四月乙卯赦天下乙巳賜民爵一級五月除田半租為孝文立太宗廟令羣臣無朝賀匈奴入代與約和親

二年春封故相國蕭何孫係為武陵侯男子二十而得傳四月壬午孝文太后崩廣川長沙王皆之國丞相申屠嘉卒八月以御史大夫開封侯陶青為丞相彗星出東北秋衡山雨雹大者五寸深者二尺熒惑逆行守北辰月出北辰間歲星逆行天廷中置南陵及內史祝祠為縣

三年正月乙巳赦天下長星出西方天火熾雒陽東宮大殿城室吳王濞楚王戊趙王遂膠西王卬濟南王辟光菑川王賢膠東王雄渠反發兵西鄉天子為

誅晁錯遺袁盎論告不止遂西圍梁上乃遣大將軍竇嬰太尉周亞夫將兵誅之六月乙亥赦亡軍及楚元王子執等與謀反者封大將軍竇嬰為魏其侯立楚元王子平陸侯劉禮為楚王立皇子端為膠西王子勝為中山王徙濟北王志為菑川王淮陽王餘為魯王汝南王非為江都王齊王將廬燕王嘉皆薨四年夏立太子立皇子徹為膠東王六月甲戌赦天下後九月更以弋陽為陽陵復置津關用傳出入冬以趙國為邯鄲郡

五年三月作陽陵渭橋五月募徙陽陵予錢二十萬江都大暴風從西方來壞城十二丈丁卯封長公主子嬌為隆慮侯徙廣川王為趙王

六年春封中尉趙綰為建陵侯江都丞相嘉為建平侯隴西太守渾邪為平曲侯趙主相嘉為江陵侯故將軍布為郿侯梁楚二王皆薨後九月代馳道樹殖蘭池

七年冬廢栗太子為臨江王十二月晦日有蝕之春免徒隸作陽陵者丞相青免二月乙巳以太尉條侯周亞夫為丞相四月乙巳立膠東王太后為皇后丁巳立膠東王為太子名徹

中元年封故御史大夫周苛孫平為繩侯故御史大夫周昌子左車為安陽侯四月乙巳赦天下賜爵一級除禁錮地動衡山原都雨雹大者尺八寸

中二年二月匈奴入燕遂不和親三月召臨江王來即死中尉府中夏立皇子越為廣川王子寄為膠東王封四侯九月甲戌日食中三年冬罷諸侯御史中丞吞匈奴王二人率其徒

來降皆封為列侯立皇子方乘為清河王三月彗星出西北丞相周亞夫死以御史大夫桃侯劉舍為丞相四月地動九月戊戌晦日食軍東都門外中四年三月置德陽宮大蝗秋赦徒作陽陵者中五年夏立皇子舜為常山王封十侯六月丁巳赦天下賜爵一級天下大潦更命諸侯丞相曰相秋地動

中六年二月己卯行幸雍郊見五帝三月雨雹四月梁孝王城陽共王汝南王皆薨立梁孝王子明為濟川王子彭離為濟東王子定為山陽王子不識為濟陰王梁分為五封四侯更命廷尉為大理將作少府為將作大匠主爵中尉為都尉長信詹事為長信少府將行為大長秋大行為行人奉常為太常典客為大行治粟內史為大農以大內為二千石置左右內官屬大內七月辛亥日食八月匈奴入上郡

後元年冬更命中大夫為衛尉三月丁酉赦天下賜爵一級中二千石諸侯相爵右庶長四月大酺五月丙戌地動其蚤食時復動上庸地動二十二日壞城垣七月乙巳日食丞相劉舍免八月壬辰以御史大夫綰為丞相封為建陵侯

後二年正月地一日三動鄧將軍擊匈奴酺五日令內史郡不得食馬粟沒入縣官令徒隸衣七綬布止馬春為歲不登禁天下食不造歲省列侯遣之國三月匈奴入鴈門十月租長陵田大旱衡山國河東雲中郡民疫

後三年十月日月皆食赤五日十二月晦雷日如紫五星逆行守太微月貫天庭中正月甲寅皇太子冠

甲子孝景皇帝崩遺詔賜諸侯王以下至民爲父後爵一級天下戶百錢出宮人歸其家復無所與太子卽位是爲孝武皇帝三月封皇太后弟蚡爲武安侯弟勝爲周陽侯置陽陵

太史公曰漢興孝文施大德天下懷安至孝景不復憂異姓而晁錯刻削諸侯遂使七國俱起合從而西鄉以諸侯大盛而錯爲之以不漸也及主父偃言之而諸侯以弱卒以安安危之機豈不以謀哉

按漢書景帝本紀孝景皇帝文帝太子也母曰竇皇后後七年六月文帝崩丁未太子卽皇帝位尊皇太后薄氏曰太皇太后皇后曰皇太后九月有星孛于西方

元年冬十月詔曰蓋聞古者祖有功而宗有德制禮樂各有由歌者所以發德也舞者所以明功也高廟酎奏武德文始五行之舞孝惠廟酎奏文始五行之舞孝文皇帝臨天下通關梁不異遠方除誹謗去肉刑賞賜長老收恤孤獨以遂羣生減者欲不受獻罪人不孥不誅亡罪不私其利也除宮刑出美人重絕人之世也朕既不敏弗能勝識此皆上世之所不及而孝文皇帝親行之德厚侔天地利澤施四海靡不獲福明象乎日月而廟樂不稱朕甚懼焉其爲孝文皇帝廟爲昭德之舞以明休德然後祖宗之功德施于萬世永永無窮朕甚嘉之其與丞相列侯中二千石禮官具禮儀奏丞相臣嘉等奏曰陛下未思孝道立昭德之舞以明孝文皇帝之盛德皆臣嘉等愚所不及臣謹議世功莫大於高皇帝德莫盛於孝文皇帝高皇帝廟宜爲帝者太祖之廟孝文皇帝廟宜爲

帝者太宗之廟天子宜世世獻祖宗之廟郡國諸侯宜各爲孝文皇帝立太宗之廟諸侯王列侯使者侍祠天子所獻祖宗之廟請宣布天下制曰可春正月詔曰間者歲比不登民多乏食天絕天年朕甚痛之郡國或磽陁無所農桑穀畜或地饒廣薦草莽水泉利而不得從其議民欲徙寬大地者聽之夏四月赦天下賜民爵一級遣御史大夫青翟至代下與匈奴和親五月令田半租秋七月詔曰吏受所監臨以飲食免重受財物賤買貴賣論輕廷尉與丞相更議著令廷尉信謹與丞相議曰吏及諸有秩受其官屬所監所治所行所將其與飲食計償費勿論他物若買故賤賣故貴皆坐臧爲盜沒入臧縣官吏遷徙免罷受其故官屬所將監治送財物奪爵爲士伍免之無爵罰金二斤令沒入所受有能捕告界其所受臧

二年冬十二月有星孛于西南令天下男子年二十始傳春三月立皇子德爲河間王闕爲臨江王餘爲淮陽王非爲汝南王彭祖爲廣川王發爲長沙王夏四月壬午太皇太后崩六月丞相嘉薨封故相國蕭何孫係爲列侯秋與匈奴和親

三年冬十二月詔曰襄平侯嘉子恢說不孝謀反欲以殺嘉大逆無道其赦嘉爲襄平侯及妻子當坐者復故爵論恢說及妻子如法春正月淮陽王宮正殿災吳王濞膠西王卬楚王戊趙王遂濟南王辟光菑川王賢膠東王雄渠皆舉兵反大赦天下遣太尉亞夫大將軍實嬰將兵擊之斬御史大夫晁錯以謝七國二月壬子晦日有蝕之諸將破七國斬首十餘萬級追斬吳王濞於丹徒膠西王卬楚王戊趙王遂濟

南王辟光菑川王賢膠東王雄渠皆自殺夏六月詔曰迺者吳王濞等爲逆起兵相脅誣吏民吏民不得已今濞等已滅吏民當坐濞等及逋逃亡軍者皆赦之楚元王子執等與濞等爲逆朕不忍加法除其籍毋令汙宗室立平陸侯劉禮爲楚王續元王後立皇子端爲膠西王勝爲中山王賜民爵一級

四年春復置諸關用傳出入夏四月己巳立皇子榮爲皇太子微爲膠東王六月赦天下賜民爵一級秋七月臨江王闕薨十月戊戌晦日有蝕之

五年春正月作陽陵邑夏募民徙陽陵賜錢二十萬遣公主嫁匈奴單于

六年冬十二月雷霖雨秋九月皇后薄氏廢七年冬十一月庚寅晦日有蝕之春正月廢皇太子榮爲臨江王二月罷太尉官夏四月乙巳立皇后王氏丁巳立膠東王微爲皇太子賜民爲父後者爵一級

中元年夏四月赦天下賜民爵一級封故御史大夫周苛周昌孫子爲列侯

二年春二月令諸侯王薨列侯初封及之國大鴻臚奏諡諡策列侯薨及諸侯太傅初除之官大行奏諡諡策王薨遣光祿大夫弔視祠視喪事因立嗣子列侯薨遣太中大夫弔視喪事因立嗣其薨葬國得發民輓喪穿復土治墳無過三百人畢事匈奴入燕故磔曰棄市勿復磔三月臨江王榮坐侵太宗廟地徵詣中尉自殺夏四月有星孛于西北立皇子越爲廣川王奇爲膠東王秋七月更郡守爲太守郡尉爲都尉九月封故楚趙相內史前死事者八人子

皆爲列侯甲戌晦日有蝕之

三年冬十一月罷諸侯御史大夫官春正月皇太后崩夏旱禁酤酒秋九月蝗有星孛於西北戊戌晦日有蝕之立皇子乘爲清河王

四年春三月起德陽宮御史大夫綰奏禁馬高五尺九寸以上齒未平不得出關夏蝗秋赦徒作陽陵者死罪欲腐者許之十月戊午日有蝕之

五年夏立皇子舜爲常山王六月赦天下賜民爵一級秋八月己酉未央宮東闕災更名諸侯丞相爲相九月詔曰法令度量所以禁暴止邪也獄人之大命死者不可復生吏或不奉法令以貨賂爲市朋黨比周以苛爲察以刻爲明令亡罪者失職朕甚憐之有罪者不伏罪姦法爲暴甚亡謂也諸獄疑若雖文致於法而於人心不厭者輒蠲之

六年冬十月行幸雍郊五時十二月改諸官名定鑄錢僞黃金棄市律春三月雨雪夏四月梁王薨分梁爲五國立孝王子五人皆爲王五月詔曰夫吏者民之師也車駕衣服宜稱吏六百石以上皆長吏也亡度者或不吏服出入閭里與民亡異令長吏二千石車朱兩轎千石至六百石朱左轎車騎從者不稱其官衣服下吏出入閭巷亡吏體者二千石上其官屬三輔舉不如法令者皆上丞相御史請之先是吏多軍功車服尚輕故爲設禁又惟酷吏奉憲失中迺詔有司減笞法定箠令語在刑法志六月匈奴入雁門至武泉入上郡取苑馬吏卒戰死者二千人秋七月辛亥晦日有蝕之

後元年春正月詔曰獄重事也人有智愚官有上下

獄疑者獄有司有所不能決移廷尉有令獄而後不當獄者不爲失欲令治獄者務先寬二月赦天下賜民爵一級中二千石諸侯相爵右庶長夏大酺五日民得酤酒五月地震秋七月乙巳晦日有蝕之條侯周亞天下獄死

二年冬十月省徹侯之國春匈奴入馬門太守馮敬與戰死發車騎材官屯春以歲不登禁內郡食馬粟沒入之夏四月詔曰雕文刻鏤傷農事者也錦繡纂組害女紅者也農事傷則饑之本也女紅害則寒之原也夫饑寒並至而能亡爲非者寡矣朕親耕后親桑以奉宗廟泰盛祭服爲天下先不受獻減太官省繇賦欲天下務農蠶素有畜積以備災害彊母孺弱衆母暴寡老者以壽終幼孤得遂長今歲或不登民食頗寡其咎安在或詐僞爲吏更以貨賂爲市漁奪百姓侵牟萬民縣丞長吏也好法與盜盜甚無謂也其令二千石各修其職不事官職耗亂者丞相以聞請其罪布告天下使明知朕意五月詔曰人不患其不知患其爲詐也不患其不勇患其爲暴也不患其不富患其亡厭也其唯廉士寡欲易足今嘗算十以上迺得宦廉士算不必衆有市籍不得宦無嘗又不得宦朕甚愍之嘗算四得宦亡令廉士久失職貪夫長利秋大旱

三年春正月詔曰農天下之本也黃金珠玉饑不可食寒不可衣以爲幣用不識其終始閭閻或不登意爲未者衆農民寡也其令郡國務勸農桑益種植可得衣食物吏發民若取庸采黃金珠玉者坐賊爲盜二千石聽者與同罪皇太子冠賜民爲父後者爵一

級甲子帝崩於未央宮遺詔賜諸侯王列侯馬二駟吏二千石黃金二斤吏民戶百錢出宮人歸其家復終身二月癸酉葬陽陵

贊曰孔子稱斯民三代之所以直道而行也信哉周秦之敝罔密文峻而姦軌不勝漢興掃除煩苛與民休息至於孝文加之以恭儉孝景遵業五六十年載之間至於移風易俗黎民醇厚周云成康漢言文景美矣

武帝本紀

按史記武帝本紀孝武皇帝者孝景中子也母曰王太后孝景四年以皇子爲膠東王孝景七年栗太子廢爲臨江王以膠東王爲太子孝景十六年崩太子卽位爲孝武皇帝帝初卽位尤敬鬼神之祀元年漢興已六十餘歲矣天下又安薦紳之屬皆望天子封禪改正度也而上鄉儒術招賢良趙綰王臧等以文學爲公卿欲議古立明堂城南以朝諸侯草巡狩封禪改歷服色事未就會寶太后治黃老言不好儒術使人微伺得趙綰等姦利事召案綰臧自殺諸所與爲者皆廢後六年寶太后崩其明年上徵文學之士公孫弘等明年上初至雍郊見五時後常三歲一郊是時上求神君舍之上林中躡氏觀神君者長陵女子以子死悲哀故見神於先後宛若若祠之其室民多往祠平原君往祠其後子孫以尊顯及武帝卽位則厚禮置祠之內中聞其言不見其人云是時而李少君亦以祠竈穀道卻老方見上上尊之少君者故深澤侯入以主方匿其年及所生長

常自謂七十能使物卻老其游以方徧諸侯無妻子人聞其能使物及不死更饋遺之常餘金錢帛衣食人皆以爲不治產業而饒給又不知其何所人愈信爭事之少君資好方善爲巧發奇中嘗從武安侯飲坐中有年九十餘老人少君乃言與其大父游射處老人爲見時從其大父行識其處一坐盡驚少君見上上有故銅器問少君少君曰此器齊桓公十年陳於柏寢已而案其刻果齊桓公器一宮盡駭以少君爲神數百歲人也少君言於上曰祠竈則致物致物而丹砂可化爲黃金黃金成以爲飲食器則益壽益壽而海中蓬萊僊者可見見之以封禪則不死黃帝是也臣嘗游海上見安期生食巨棗大如瓜安期生僊者通蓬萊中合則見人不合則隱於是天子始親祠竈而遣方士入海求蓬萊安期生之屬而事化丹砂諸藥齊爲黃金矣居久之李少君病死天子以爲化去不死也而使黃鍾史寬舒受其方求蓬萊安期生莫能得而海上燕齊怪迂之方士多相效更言神事矣亳人薄誘忌奏祠泰一方曰天神貴者泰一泰一佐曰五帝古者天子以春秋祭泰一東南郊用太牢具七日爲壇開八通之鬼道於是天子令太祝立祠長安東南郊常奉祠如忌方其後人有上書言古者天子三年一用太牢具祠神三一天一地一泰一天子許之令太祝領祠之於忌泰一壇上如其方後人復有上書言古者天子常以春秋解祠祠黃帝用一梟破鏡冥羊用羊祠馬行用一青牡馬泰一臯山山君地長用牛武夷君用乾魚陰陽使者以一牛令祠官領之如其方而祠於忌泰一壇旁其後天子苑

有白鹿以其皮爲幣以發瑞應造白金焉其明年郊雍獲一角獸若鹿然有司曰陛下肅祇郊祀上帝報享錫一角獸蓋麟云於是薦以薦五時時加一牛以燎賜諸侯白金以風符應合於天地於是濟北王以爲天子且封禪乃上書獻泰山及其旁邑天子受之更以他縣償之常山王有舉遷天子封其弟於眞定以續先王祀而以常山爲郡然後五嶽皆在天子之邦其明年齊人少翁以鬼神方見上上有所幸王夫人夫人卒少翁以方術蓋夜致王夫人及竈鬼之貌云天子自帷中望見焉於是乃拜少翁爲文成將軍賞賜甚多以客禮禮之文成言曰上即欲與神通宮室被服不象神神物不至乃作畫雲氣車及各以勝日駕車辟惡鬼又作甘泉宮中爲臺室畫天地泰一諸神而置祭具以致天神居歲餘其方益衰神不至乃爲帛書以飯牛詳弗知也言此牛腹中有奇殺而視之得書書言甚怪天子疑之有識其手書問之人果爲書於是誅文成將軍而隱之其後則又作柏梁銅柱承露仙人掌之屬矣文成死明年天子病鼎湖甚巫醫無所不致至不愈游水發根乃言曰上郡有巫病而鬼下之上召置祠之甘泉及病使人問神君神君言曰天子毋憂病病少愈強與我會甘泉於是病愈遂幸甘泉病良已大赦天下置壽宮神君祠神君最貴者大夫其佐曰太祝司命之屬皆從之非可得見聞其音與人言等時去時來則風肅然也居室帷中時畫言然常以夜天子祓然後入因巫爲主人關飲食所欲者言行下又置壽宮北宮張羽旗設供具以禮神君神君所言上使人受書其言命之曰書法

其所語世俗之所知也母絕殊者而天子獨喜其事祕世莫知也其後三年有司言元宜以天瑞命不宜以一二數一元曰建元二元以長星曰元光三元以郊得一角獸曰元狩云其明年冬天子郊雍議曰今上帝朕親郊而后土母祀則禮不答也有司與太史公祠官寬舒等議天地牲角繭栗今陛下親祀后土后土宜於澤中園丘爲五壇壇一黃犢太牢具已祠盡瘞而從祠衣上黃於是天子遂東始立后土祠汾陰脽上如寬舒等議上親望拜如上帝禮禮畢天子遂至榮陽而還過維陽下詔曰三代邈絕遠矣難存其以三十里地封周後爲周子南君以奉先王祀焉是歲天子始巡郡縣侵尋於泰山矣其春樂成侯上書言樂大樂大樂東宮人故嘗與文成將軍同師已而爲膠東王尚方而樂成侯姊爲康王后母子康王死他姬子立爲王而康后有淫行與王不相中得相危以法康后聞文成已死而欲自媚於上乃遣樂大因樂成侯求見言方天子既誅文成後悔恨其早死惜其方不盡及見樂大大悅大爲人長美言多方略而敢爲大言處之不疑大言曰臣嘗往來海中見安期美門之屬願以爲臣賤不信臣又以爲康王諸侯爾不足予方臣數言康王康王又不信臣臣之師曰黃金可成而河決可塞不死之藥可得僊人可致也臣恐效文成則方士皆掩口惡敢言方哉上曰文成食馬肝死爾子誠能修其方我何愛乎大曰臣師非有求人人者求之陛下必欲致之則貴其使者令有親屬以客禮待之勿卑使各佩其信印乃可使通言於神人神人尚肯邪不邪致尊其使然後可致也於

是上使先驗小方闔旗旗自相觸擊是時上方憂河決而黃金不就乃拜大爲五利將軍居月餘得四金印佩天士將軍地士將軍大通將軍天道將軍印制詔御史昔禹疏九江決四瀆問者河溢阜陸隄絲不息朕臨天下二十有八年天若遺朕土而大通焉乾稱蜚龍鴻漸於般意庶幾與焉其以二千戶封地士將軍大爲樂通侯賜列侯甲第僮千人乘輿兵車馬帷帳器物以充其家又以衛長公主妻之齋金萬斤更名其邑曰當利公主天子親如五利之第使者存問所給連屬於道自大主將相以下皆置酒其家獻遺之於是天子又刻玉印曰天道將軍使使衣羽衣夜立白茅上五利將軍亦衣羽衣立白茅上受印以示弗臣也而佩天道者且爲天子道天神也於是五利常夜祠其家欲以下神神未至而百鬼集矣然頗能使之其後治裝行東入海求其師云大見數月佩六印貴振天下而海上燕齊之間莫不搢腕而自言有禁方能神僊矣其夏六月中汾陰巫錦爲民祠魏雕后土營旁見地如鉤狀培視得鼎鼎大異於衆鼎文鏤無款識怪之言吏告河東太守勝勝以聞天子使使驗問巫錦得鼎無姦詐乃以禮祠迎鼎至甘泉從行上薦之至中山晏溫有黃雲蓋焉有應過上自射之因以祭云至長安公卿大夫皆議請尊寶鼎天子曰間者河溢歲數不登故巡祭后土祈爲百姓育穀今年豐庶未有報鼎曷爲出哉有司皆曰聞昔太帝與神鼎一一者一統天地萬物所繫終也黃帝作寶鼎三象天地人也禹收九牧之金鑄九鼎皆嘗醵烹上帝鬼神遭聖則興遷於夏商周德衰宋之社

亡鼎乃淪伏而不見頌云自堂祖基自羊祖牛鼎鼎及鼎不虞不驚胡考之休今鼎至甘泉光潤龍變承休無疆合茲中山有黃白雲降蓋若獸爲符路弓乘矢集獲壇下報祠大饗惟受命而帝者心知其意而合德焉鼎宜見於祖廟藏於帝廷以合明應制曰可入海求蓬萊者言蓬萊不遠而不能至者殆不見其氣上乃遣望氣佐候其氣云其秋上幸雍且郊或曰五帝泰一之佐也宜立泰一而上親郊之上疑未定齊人公孫卿曰今年得寶鼎其冬辛巳朔旦冬至與黃帝時等卿有札書曰黃帝得寶鼎宛侯問於鬼吏區區對曰黃帝得寶鼎神策是歲己酉朔旦冬至得天之紀終而復始於是黃帝迎日推策後率二十歲得朔旦冬至凡二十推三百八十年黃帝仙登於天卿因所忠欲奏之所忠視其書不經疑其妄書謝曰寶鼎事已決矣尚何以爲卿因嬖人奏之上大悅召問卿對曰受此書申功申功已死上曰申功何人也卿曰申功齊人也與安期生通受黃帝言無書獨有此鼎書曰漢興復當黃帝之時漢之聖者在高祖之孫且曾孫也寶鼎出而與神通封禪封禪七十二王唯黃帝得上泰山封申功曰漢主亦當上封上封則能仙登天矣黃帝時萬諸侯而神靈之封居七天下名山八而三在蠻夷五在中國中國華山首山太室太山東萊此五山黃帝之所常遊與神會黃帝且戰且學仙患百姓非其道乃斷斬非鬼神者百餘歲然後得與神通黃帝郊雍上帝宿三月鬼吏區號大鴻死葬雍故鴻冢是也其後黃帝接萬靈明廷明廷者甘泉也所謂寒門者谷口也黃帝采首山銅鑄鼎

於荆山下鼎既成有龍垂胡髯下迎黃帝黃帝上騎羣臣後宮從上龍七千餘人龍乃上去餘小臣不得上乃悉持龍髯龍髯拔墮黃帝之弓百姓仰望黃帝既上天乃抱其弓與龍胡髯號故後世因名其處曰鼎湖其弓曰烏號於是天子曰嗟乎吾誠得如黃帝吾視去妻子如脫屣耳乃拜卿爲郎東使候神於太室上遂郊雍至隴西西登空桐幸甘泉令祠官寬舒等具泰一祠壇壇放薄忌泰一壇壇三垓五帝壇環居其下各如其方黃帝西南除八通鬼道泰一所用如雍一時物而加醴棗脯之屬殺一犛牛以爲俎豆牢具而五帝獨有俎豆醴進其下四方地爲餼食羣神從者及北斗云已祠昨餘皆燎之其牛色白鹿居其中麋在鹿中水而泊之祭日以牛祭月以羊饗特泰一祝宰則衣紫及繡五帝各如其色日赤月白十一月辛巳朔旦冬至昧爽天子始郊拜泰一朝朝日夕夕月則揖而見泰一如雍禮其贊饗曰天始以寶鼎神策授皇帝朔而又朔終而復始皇帝敬拜見焉而衣上黃其祠列火滿壇旁壇旁烹炊具有司云祠上有光焉公卿言皇帝始郊見泰一雲陽有司奉瑱玉嘉牲薦饗是夜有美光及晝黃氣上屬天太史公祠官寬舒等曰神靈之休祐福兆祥宜因此地光域立泰時壇以明應令太祝領祀及臘間祠三歲天子一郊見其秋爲伐南粵告祝泰一以牡荆畫幡日月北斗登龍以象天一三星爲泰一鋒名曰靈旗爲兵禱則太史奉以指所伐國而五利將軍使不敢入海之泰山祠上使人微隨驗實無所見五利妄言見其師其方盡多不讎上乃誅五利其冬公孫卿候神河

南見僊人跡纖氏城上有物若雉往來城上天子親幸纖氏城視跡問卿得無效文成五利乎卿曰僊者非有求人主人主求之其道非少寬假神不來言神事如迂誕積以歲乃可致於是郡國各除道繕治宮觀名山神祠所以望幸矣其年既減南越上有嬖臣李延年以好音見上善之下公卿議曰民間祠尚有鼓舞之樂今郊祠而無樂豈稱乎公卿曰古者祀天地皆有樂而神祇可得而禮或曰秦帝使素女鼓五十弦瑟悲帝禁不止故破其瑟爲二十五弦於是塞南越禱祠泰一后土始用樂舞益名歌兒作二十五弦及篴篥瑟自此起其來年冬上議曰古者先振兵澤旅然後封禪乃遂北巡朔方勒兵十餘萬還祭黃帝冢橋山澤兵須如上曰吾聞黃帝不死今有冢何也或對曰黃帝已仙上天羣臣葬其衣冠既至甘泉爲且用事泰山先類祠太一自得寶鼎上與公卿諸生議封禪封禪用希曠絕莫知其儀禮而羣儒采封禪尚書周官王制之望祀射牛事齊人丁公年九十餘曰封者合不死之名也秦皇帝不得上封陛下必欲上稍上即無風雨遂上封矣於是乃令諸儒習射牛草封禪儀數年至且行天子既聞公孫卿及方士之言黃帝以上封禪皆致怪物與神通欲放黃帝以嘗接神僊人蓬萊士高世比德於九皇而頗采儒術以文之羣儒既以不能辯明封禪事又牽拘於詩書古文而不敢騁上爲封禪器示羣儒羣儒或曰不與古同徐偃又曰太常諸生行禮不如魯善周霸屬圖封事於是上絀偃霸盡罷諸儒弗用三月遂東幸纖氏禮登中嶽太室從官在山下聞若有言萬歲

云問上上不言問下下不言於是以三百戶封太室奉祠命曰崇高邑東上泰山山之草木葉未生乃令人上石立之泰山巔上遂東巡海上行禮祠八神齊人之上疏言神怪奇方者以萬數然無驗者乃益發船令言海中神山者數千人求蓬萊神人公孫卿持節常先行候名山至東萊言夜見一人長數丈就之則不見見其跡甚大類禽獸云羣臣有言見一老父牽狗言吾欲見巨公已忽不見上既見大跡未信及羣臣有言老父則大以爲僊人也宿留海上與方士傳事及間使求僊人以千數四月還至奉高上念諸儒及方士言封禪人人殊不經難施行天子至梁父禮祠地主乙卯令侍中儒者皮弁薦紳射牛行事封泰山下東方如郊祠泰一之禮封廣丈二尺高九尺其下則有玉牒書書祕禮畢天子獨與侍中奉車子侯上泰山亦有封其事皆禁明日下陰道丙辰禪泰山下隄東北肅然山如祭后土禮天子皆親拜見衣上黃而盡用樂焉江淮間一茅三脊爲神藉五色土益雜封纒遠方奇獸蜚蜮及白雉諸物頗以加祠咒施牛犀象之屬弗用皆至泰山然後去封禪祠其夜若有光晝有白雲起封中天子從封禪還坐明堂羣臣更上壽於是制詔御史朕以眇眇之身承至尊統統焉懼弗任維德菲薄不明於禮樂修祀泰一若有象景光屑如有望依依震於怪物欲止不敢遂登封泰山至於梁父而后禪肅然自新嘉與士大夫更始賜民百戶牛一酒十石加年八十孤寡布帛二匹復博奉高蛇丘歷城毋出今年租稅其放天下如乙卯赦令行所過毋有復作事在二年前皆勿聽治又下

詔曰古者天子五載一巡狩用事泰山諸侯有朝宿地其令諸侯各治邸泰山下天子既已封禪泰山既無風雨苗而方士更言蓬萊諸神山若將可得於是上欣然庶幾遇之乃復東至海上望冀遇蓬萊焉奉車子侯暴病一日死上乃遂去並海上北至碣石巡自遼西歷北邊至九原五月返至甘泉有司言寶鼎出爲元鼎以今年爲元封元年其秋有星茀於東井後十餘日有星茀於三能望氣王朔言候獨見其星出如瓠食頃復入焉有司言曰陛下建漢家封禪天其報德星云其來年冬郊雍五帝還拜祝祠泰一贊饗曰德星昭衍厥維休祥壽星仍出淵耀光明信星昭見皇帝敬拜泰況之饗其春公孫卿言見神人東萊山若云見天子天子於是幸纖氏城拜卿爲中大夫遂至東萊宿留之數日毋所見見大人跡復遣方士求神怪采芝藥以千數是歲旱於是天子既出母名乃禱萬里沙過祠泰山還至瓠子自臨塞決河畱二日沈祠而去使二卿將卒塞決河河徙二渠復禹之故跡焉是時既減南越越人勇之乃言越人俗信鬼而其祠皆見鬼數有效昔東甌王敬鬼壽至百六十歲後世謾怠故衰耗乃令越巫立越祝祠安臺無壇亦祠天神上帝百鬼而以雞卜上信之越祠難卜始用焉公孫卿曰僊人可見而上往常遠以故不見今陛下可爲觀如纖氏城置脯棗神人宜可致且僊人好樓居於是上令長安則作蜚廉桂觀甘泉則作益延壽觀使卿持節設具而候神人乃作通天臺置祠具其下將招來神仙之屬於是甘泉更置前殿始廣諸宮室夏有芝生殿防內中天子爲塞河與通天

臺若有光云乃下詔曰甘泉防生芝九莖赦天下母有復作其明年伐朝鮮夏旱公孫卿曰黃帝時封則天旱乾封三年上乃下詔曰天旱意乾封乎其令天下尊祠靈星焉其明年上郊雍通回中道巡之春至鳴澤從西河歸其明年冬上巡南郡至江陵而東登禮潛之天柱山號曰南嶽浮江自尋陽出樅陽過彭蠡祀其名山川北至琅邪並海上四月中至奉高修封焉初天子封泰山泰山東北陞古時有明堂處處險不敞上欲治明堂奉高旁未曉其制度濟南人公玉帶上黃帝時明堂圖明堂圖中有一殿四面無壁以茅蓋通水圜宮垣為複道上有樓從西南入命曰昆侖天子從之入以拜祠上帝焉於是上令奉高作明堂汶上如帶圖及五年修封則祠泰一五帝於明堂上坐令高皇帝祠坐對之祠后土於下房以二十太半天子從崑崙道入始拜明堂如郊禮禮畢燎堂下而上又上泰山有祕祠其顛而泰山下祠五帝各如其方黃帝并赤帝而有司侍祠焉泰山上舉火下悉應之其後二歲十一月甲子朔旦冬至推歷者以本統天子親至泰山以十一月甲子朔旦冬至日祠上帝明堂每修封禪其贊饗曰天增授皇帝泰元神策周而復始皇帝敬拜泰一東至海上考入海及方士求神者莫驗然益遣冀遇之十一月乙酉柏梁栽十二月甲午朔上親禪高里祠后土臨渤海將以望祠蓬萊之屬冀至殊庭焉上還以柏梁栽故朝受計甘泉公孫卿曰黃帝就青靈臺十二月燒黃帝乃治明庭明庭甘泉也方士多言古帝王有都甘泉者其後天子又朝諸侯甘泉甘泉作諸侯邸舅之乃曰越

俗有火裁復起屋必以大用勝服之於是作建章宮度為千門萬戶前殿度高未央其東則鳳闕高二十餘丈其西則唐中數十里虎圈其北治大池漸臺高二十餘丈名曰泰液池中有蓬萊方丈瀛洲壺梁象海中神山龜魚之屬其南有玉堂璧門大鳥之屬乃立神明臺井幹樓度五十餘丈輦道相屬焉夏漢改曆以正月為歲首而色尚黃官名更印章以五字因為太初元年是歲西伐大宛蝗大起丁夫人雒陽虞初等以方祠詛匈奴大宛焉其明年有司言雍五時無牢熟具芬芳不備乃命祠官進時犢牢具五色食所勝而以木耦馬代駒焉獨五帝用駒行親郊用駒及諸名山山川用駒者悉以木耦馬代行過乃用駒他禮如故其明年東巡海上考神仙之屬未有驗者方士有言黃帝時為五城十二樓以候神人於執期命曰迎年上許作之如方明年上親禮祠上帝衣上黃焉公玉帶曰黃帝時雖封泰山然風后封鉅岐伯令黃帝封東泰山神凡山合符然後不死焉天子既令設祠具至東泰山東泰山卑小不稱其聲乃令祠官禮之而不封禪焉其後令帶奉祠候神物夏還泰山山修五年之禮如前而加禪祠石閭石閭者在泰山下陞南方方士多言此傳人之閭也故上親禪焉其後五年復至泰山修封還過祭常山今天子所興祠泰一后土三年親郊祠建漢家封禪五年一修封薄忌泰一及三一冥羊馬行赤星五寬舒之祠官以歲時致禮凡六祠皆太祝領之至如八神諸神明年凡山他名祠行過則祀去則已方士所興祠各自主其人終則已祠官弗主他祠皆如其故今上封禪其後

十二歲而還徧於五嶽四瀆矣而方士之候祠神人入海求蓬萊終無有驗而公孫卿之候神者猶以大人跡為解無其效天子亦怠厭方士之怪迂語矣然終羈縻弗絕冀遇其真自此之後方士言祠神者彌衆然其效可睹矣
太史公曰余從巡祭天地諸神名山川而封禪焉入壽官侍祠神語究觀方士祠官之言於是退而論次自古以來用事於鬼神者具見其表裏後有君子得以覽焉至若俎豆珪幣之詳獻酬之禮則有司存焉按漢書武帝本紀孝武皇帝景帝中子也母曰王美人年四歲立為膠東王七歲為皇太子母為皇后十六歲後三年正月景帝崩甲子太子即皇帝位尊皇太后寶氏曰太皇太后皇后曰皇太后三月封皇太后同母弟田蚡勝皆為列侯
建元元年冬十月詔丞相御史列侯中二千石二千石諸侯相舉賢良方正直言極諫之士丞相綰奏所舉賢良或治申商韓非蘇秦張儀之言亂國政請皆罷奏可春二月赦天下賜民爵一級年八十復二算九十復甲卒行三銖錢夏四月己巳詔曰古之立教鄉里以齒朝廷以爵扶世導民莫善於德然則於鄉里先者艾奉高年古之道也今天下孝子順孫願自竭盡以承其親外迫公事內乏資財是以孝心闕焉朕甚哀之民年九十以上已有受鬻法為復子若孫令得身帥妻妾遂其供養之事五月詔曰河海潤千里其令祠官修山川之祠為歲事曲加禮赦吳楚七國帑輸在官者秋七月詔曰衛士轉置送迎二萬人其省萬人罷苑馬以賜貧民議立明堂遣使者安車

蒲輪束帛加璧徵魯申公

二年冬十月御史大夫趙綰坐請毋奏事太皇太后及郎中令王臧皆下獄自殺丞相嬰太尉蚡免春二月丙戌朔日有蝕之夏四月戊申有如日夜出初置茂陵邑

三年春河水溢於平原大饑人相食賜徙茂陵者戶錢二十萬田二頃初作便門橋秋七月有星孛於西北濟川王明坐殺太傅中傳廢遷防陵閼越圍東甌東甌告急遣中大夫嚴助持節發會稽兵浮海救之未至閼越走兵還九月丙子晦日有蝕之

四年夏有風赤如血六月旱秋九月有星孛於東北五年春罷三銖錢行半兩錢置五經博士夏四月平原君薨五月大蝗秋八月廣川王越清河王乘皆薨六年春二月乙未遼東高廟災夏四月壬子高園便殿火上素服五日五月丁亥太皇太后崩秋八月有星孛於東方長竟天閼越王郢攻南越遣大行王恢將兵出豫章大司農韓安國出會稽擊之未至越人殺郢降兵還

元光元年冬十一月初令郡國舉孝廉各一人衛尉李廣為驍騎將軍屯雲中中尉程不識為車騎將軍屯鴈門六月罷夏四月赦天下賜民長子爵一級復七國宗室前絕屬者五月詔賢良曰朕聞昔在唐虞畫象而民不犯日月所燭莫不率俾周之成康刑錯不用德及鳥獸教通四海海外肅春北發渠搜氏羌徠服星辰不孛日月不蝕山陵不崩川谷不塞麟鳳在郊數河洛出圖書鳴虓何施而臻此與今朕獲奉宗廟風典以求夜寤以思若涉淵水未知所濟倚與

偉與何行而可以章先帝之洪業休德上參堯舜下配三王朕之不敏不能遠德此子大夫之所睹聞也賢良明於古今王事之體受策察問咸以書對著之於篇朕親覽焉於是董仲舒公孫弘等出焉秋七月癸未日有蝕之

二年冬十月行幸雍祠五時春詔問公卿曰朕飾子女以配單于金幣文繡賂之甚厚單于待命加嫚侵盜亡已邊境被害朕甚聞之今欲舉兵攻之何如大行王恢建議宜擊夏六月御史大夫韓安國為護軍將軍衛尉李廣為驍騎將軍太僕公孫賀為輕車將軍大行王恢為將屯將軍大中大夫李息為材官將軍將三千萬衆屯馬邑谷中誘致單于欲襲擊之單于入塞覺之走出六月軍罷將軍王恢坐首謀不進下獄死秋九月令民大酺五日

三年春河水徙從頓丘東南流入渤海夏五月封高祖功臣五人後為列侯河水決濮陽犯郡十六發卒十萬救決河起龍淵宮四年冬魏其侯寶嬰有罪棄市春三月乙卯丞相蚡薨夏四月隕霜殺草五月地震赦天下

五年春正月河間王德薨夏發巴蜀治南夷道又發卒萬人治鴈門阻險秋七月大風拔木乙巳皇后陳氏廢捕為巫蠱者皆梟首八月螟徵吏民有明當世之務習先聖之術者縣次續食令與計偕六年冬初算商車春穿漕渠通渭匈奴入上谷殺略吏民遣車騎將軍衛青出上谷騎將軍公孫敖出代輕車將軍公孫賀出雲中驍騎將軍李廣出鴈門青至龍城獲首虜七百級廣敖失師而還詔曰問者何

奴數寇邊境故遣將撫師古者治兵振旅因遭寇之方入將吏更新會上下未輯代郡將軍敖鴈門將軍廣所任不肖校尉又背義妄行棄軍而北少吏犯禁用兵之法不勸不教將率之過也教令宣明不能盡力士卒之罪也將軍已下廷尉使理正之而又加法於士卒二者並行非仁聖之心朕聞衆庶陷害欲刷恥改行復奉正義厥路亡繇其赦鴈門代郡軍士不循法者夏大旱蝗六月行幸雍秋匈奴盜邊遣將軍韓安國屯漁陽

元朔元年冬十一月詔曰公卿大夫所使總方略壹統類廣教化美風俗也夫本仁祖義褒德祿賢勸善刑暴五帝三王所繇昌也朕夙興夜寐嘉與宇內之士臻於斯路故旅耆老復孝敬選豪俊講文學稽參政事祈進民心深詔執事與廉舉孝庶幾成風紹休聖緒夫十室之邑必有忠信三人並行厥有我師今或至闔郡而不薦一人是化不究而積行之君子雍於上聞也二千石官長紀綱人倫將何以佐朕燭幽隱勸元元厲蒸庶崇鄉黨之訓哉且進賢受上賞蔽賢蒙顯戮古之道也其與中二千石禮官博士議不舉者罪有司奏議曰古者諸侯貢士壹適謂之好德再適謂之賢賢三適謂之有功過加九錫不貢士壹則黜爵再則黜地三則黜爵地畢矣夫附下罔上者死附罔上罔下者刑與聞國政而無益於民者斥在上位而不能進賢者退此所以勸善黜惡也今詔書昭先帝聖緒令二千石舉孝廉所以化元元移風易俗也不舉孝不奉詔當以不敬論不察廉不勝任也當免奏可十二月江都王非薨春三月甲子立皇后

衛氏詔曰朕聞天地不變不成施化陰陽不變物不暢茂易曰通其變使民不倦詩云九變復貫知言之選朕嘉唐虞而樂殷周據舊以鑒新其赦天下與民更始諸逋貸及辭訟在孝景後三年以前皆勿聽治秋匈奴入遼西殺太守入漁陽鴈門敗都尉殺略三千餘人遣將軍衛青出鴈門將軍李息出代復首虜數千級薺君南閭等口二十八萬人降爲蒼海郡魯王餘長沙王發皆薨

二年冬賜淮南王菑川王凡杖母朝春正月詔曰梁王城陽王親慈同生願以邑分弟其許之諸侯王請與子弟邑者朕將親覽使有列位焉於是藩國始分而子弟畢侯矣匈奴入上谷漁陽殺略吏民千餘人遣將軍衛青李息出雲中至高關遂西至符離獲首虜數千級收河南地置朔方五原郡三月乙亥晦日有蝕之夏募民徙朔方十萬口又徙郡國豪傑及嘗三百萬以上於茂陵秋燕王定國有罪自殺

三年春罷蒼海郡三月詔曰夫刑罰所以防姦也內長文所以見愛也以百姓之未洽於教化朕嘉與士大夫日新厥業祗而不解其赦天下夏匈奴入代殺太守入雁門殺略千餘人六月庚午皇太后崩秋罷西南夷城朔方城令民大酺五日

四年冬行幸甘泉夏匈奴入代定襄上郡殺略數千人

五年春大旱大將軍衛青將六將軍兵十餘萬人出朔方高關獲首虜萬五千級夏六月詔曰蓋聞導民以禮風之以樂今禮壞樂崩朕甚閔焉故詳延天下方聞之士咸薦諸朝其令禮官勸學講議治聞舉遺

典禮以爲天下先太常其議予博士弟子崇鄉黨之化以厲賢材焉丞相弘請爲博士置弟子員學者益廣秋匈奴入代殺都尉

六年春二月大將軍衛青將六將軍兵十餘萬騎出定襄斬首三千餘級還休士馬於定襄雲中鴈門赦天下夏四月衛青復將六將軍軍絕幕大克復前將軍趙信軍敗降匈奴右將軍蘇建亡軍獨身脫還贖爲庶人六月詔曰朕聞五帝不相復禮三代不同法所繇殊路而建德一也蓋孔子對定公以休遠哀公以論臣景公以節用非期不同所急異務也今中國一統而北邊未安朕甚悼之曰者大將軍巡朔方征匈奴斬首萬八千級諸禁錮及有過者咸蒙厚賞得免減罪今大將軍仍復克獲斬首萬九千級受爵賞而欲移賣者無所流馳其議爲令有司奏請置武功賞官以寵戰士

元狩元年冬十月行幸雍祠五時獲白麟作白麟之歌十一月淮南王安衡山王賜謀反誅黨與死者數萬人十二月大雨雪民凍死夏四月赦天下丁卯立皇太子賜中二千石爵右庶長民爲父後者一級詔曰朕聞告繇對禹曰在知人知人則哲惟帝難之蓋君者心也民猶支體支體傷則心懼惟帝難之蓋山修文學流貨賂兩國接壤懷於邪說而造策弑此朕之不德詩云憂心慘慘念國之爲虐已赦天下除與之更始朕嘉孝弟力田哀夫老耗孤寡鰥獨或匱於衣食甚憐愍焉其遣謁者巡行天下存問致賜曰皇帝使謁者賜縣三老孝者帛人五匹鄉三老弟者力田帛人三匹年九十以上及鰥寡孤獨帛人二

匹絮三斤八十以上米人三石有寃失職使者以聞縣鄉即賜母養聚五月乙巳晦日有蝕之匈奴入上谷殺數百人

二年冬十月行幸雍祠五時春三月戊寅丞相弘薨遣驃騎將軍霍去病出隴西至臯蘭斬首八千餘級夏馬生余吾水中南越獻馴象能言鳥將軍去病公孫敖出北地二千餘里過居延斬首三萬餘級匈奴入鴈門殺略數百人遣衛尉張騫郎中令李廣皆出右北平廣殺匈奴三千餘人盡亡其軍四千人獨身脫還及公孫敖張騫皆後期當斬贖爲庶人江都王建有罪自殺膠東王寄薨秋匈奴昆邪王殺休屠王并將其衆合四萬餘人來降置五屬國以處之以其地爲武威酒泉郡

三年春有星孛於東方夏五月赦天下立膠東康王少子慶爲六安王封故相國蕭何曾孫慶爲列侯秋匈奴入右北平定襄殺略千餘人遣謁者勸有水災郡種宿麥舉吏民能假貸貧民者以名聞減隴西北地上郡戍卒半發謫吏穿昆明池

四年冬有司言關東貧民徙隴西北地西河上郡會稽凡七十二萬五千口縣官衣食振業用度不足請收銀錫造白金及皮幣以足用初算緡錢春有星孛於東北夏有長星出於西北大將軍衛青將四將軍出定襄將軍去病出代各將五萬騎步兵踵軍後數十萬人晝至幕北圍單于斬首萬九千級至闐顏山乃還去病與左賢王戰斬首七萬餘級封狼居胥山乃還兩軍戰士死者數萬人前將軍廣後將軍食其皆後期廣自殺食其贖死

五年春三月甲午丞相李蔡有罪自殺天下馬少平杜馬匹二十萬罷牛兩錢行五銖錢徙天下姦猾吏民於邊

六年冬十月賜丞相以下至吏二千石百金千石以下至乘從者帛蠻夷錦各有差雨水亡冰夏四月乙巳廟立皇子閔為齊王旦為燕王胥為廣陵王初作詔六月詔曰日者有司以幣輕多姦農傷而未衆又禁兼并之塗故改幣以約之稽諸往古制宜於今廢期有月而山澤之民未論夫仁行而從善義立則俗易意奉憲者所以導之未明與將百姓所安殊路而橋度吏因乘執以侵蒸庶邪何紛然其擾也今遣博士大等六人分循行天下存問鰥寡廢疾無以自振業者貸與之論三老孝弟以為民師舉獨行之君子徵詣行在所朕嘉賢者樂知其人廣宣厥道士有特招使者之任也詳問隱處亡位及冤失職姦猾為害野荒治苛者舉奏郡國有所以為便者上丞相御史以聞秋九月大司馬驃騎將軍去病薨

元鼎元年夏五月赦天下大酺五日得鼎汾水上濟東王彭離有罪廢徙上庸

二年冬十一月御史大夫張湯有罪自殺十二月丞相青翟下獄死春起柏梁臺三月大雨雪夏大水關東餓死者以千數秋九月詔曰仁不異遠義不辭難今京師雖未為豐年山林池澤之饒與民共之今水潦移於江南迫隆冬至朕懼其饑寒不活江南之地火耕水耨方下巴蜀之粟致之江陵遣博士中等分循行諭告所抵無令重困吏民有振救饑民免其厄者具舉以聞

三年冬徙函谷關於新安以故關為弘農縣十一月令民告緡者以其半與之正月戊子陽陵園火夏四月雨雹關東郡國十餘饑人相食常山王舜薨子敦嗣立有罪廢徙房陵

四年冬十月行幸雍祠五時賜民爵一級女子百戶牛酒行自夏陽東幸汾陰十一月甲子立后土祠於汾陰脽上禮畢行幸樂陽還至洛陽詔曰祭地冀州瞻望河洛巡省豫州觀於周室邈而無祀詢問耆老適得孽子嘉其封嘉為周子南君以奉周祀春二月中山王勝薨夏封方士樂大為樂通侯位上將軍六月得寶鼎后土祠旁秋馬生渥洼水中作寶鼎天馬之歌立常山惠王子商為泗水王

五年冬十月行幸雍祠五時遂踰隴登空同西臨祖厲河而還十一月辛巳朔旦冬至立泰時於甘泉天子親郊見朝日夕月詔曰朕以眇身託於王侯之上德未能綏民或饑寒故巡祭后土以祈豐年冀州雕壤迺顯文鼎獲薦於廟渥洼水出馬朕其御焉戰戰兢兢懼不克任思昭天地內惟自新詩云四牡翼翼以征不服親省邊垂用事所極望見泰一修天文禮辛卯夜若景光十有二明易曰先甲三日後甲三日朕甚念年歲未咸登飭躬齋戒丁酉拜況於郊夏四月南越王相呂嘉反殺漢使者及其王王太后赦天下丁丑晦日有蝕之秋蠅蝦蟆闔遣伏波將軍路博德出桂陽下渥水樓船將軍楊僕出豫章下潯水歸義越侯嚴為戈船將軍出零陵下離水甲為下潯將軍下蒼梧皆將罪人江淮以南樓船十萬人越馳義侯遣別將巴蜀罪人發夜郎兵下牂牁江咸會番

禹九月列侯坐獻黃金酎祭宗廟不如法奪爵者百六人丞相趙周下獄死樂通侯樂大坐誣罔要斬西羌衆十萬人反與匈奴通使攻故安圍枹罕匈奴入五原殺太守

六年冬十月發隴西天水安定騎士及中尉河南河內卒十萬人遣將軍李息郎中令徐自為征西羌平之行東將幸緱氏至左邑桐鄉聞南越破以為聞喜縣春至汲新中鄉得呂嘉首以為獲嘉縣馳義侯遣兵未及下上便令征西南夷平之遂定越地以為南海蒼梧鬱林合浦交趾九真日南珠厓儋耳郡定西南夷以為武都牂牁越嶲沈黎文山郡秋東越王餘善反攻殺漢將吏遣橫海將軍韓說中尉王溫舒出會稽樓船將軍楊僕出豫章擊之又遣浮沮將軍公孫賀出九原匈奴將軍趙破奴出令居皆二千餘里不見虜而還適分武威酒泉地置張掖敦煌郡徙民以實之

元封元年冬十月詔曰南越東甌咸伏其辜西蠻北夷頗未輯睦朕將巡邊垂擇兵振旅躬秉武節置十二部將軍親帥師焉行自雲陽北歷上郡西河五原出長城北登單于臺至朔方臨北河勒兵十八萬騎旌旗徑千餘里咸振匈奴遣使者告單于曰南越王頭已縣於漢北闕矣單于能戰天子自將待邊不能亟來臣服何但亡匿幕北寒苦之地為匈奴警焉還祠黃帝於橋山迺歸甘泉東越殺王餘善降詔曰東越險阻反覆為後世患遷其民於江淮間遂虛其地春正月行幸緱氏詔曰朕用事華山至於中嶽獲駁熊見夏后啓母石翌日親登嵩高御史乘屬在廟旁

吏卒咸聞呼萬歲者三登禮罔不答其令祠官加增
太室祠禁無伐其草木以山下戶三百爲之奉邑名
曰崇高獨給祠復亡所與行遂東巡海上夏四月癸
卯上還登封泰山降坐明堂詔曰朕以眇身承至尊
兢兢焉惟德菲薄不明於禮樂故用事八神遭天地
況施著見景象屑然如有聞震於怪物欲止不敢遂
登封泰山至於梁父然後升禮肅然自新嘉與士大
夫更始其以十月爲元封元年行所巡至博奉高蛇
丘歷城梁父民田租逋賦貸已除加年七十以上孤
寡帛人二匹四縣無出今年算賜天下民爵一級女
子百戶牛酒行自泰山復東巡海上至碣石自遼西
歷北邊九原歸於甘泉秋有星孛於東井又孛於三
台齊王閔薨

二年冬十月行幸雍祠五時春幸緱氏遂至東萊夏
四月還祠泰山至瓠子臨決河命從臣將軍以下皆
負薪塞河隄作瓠子之歌赦所過徒賜孤獨高年米
人四石還作甘泉通天臺長安飛廉館朝鮮王攻殺
遼東都尉迺募天下死罪擊朝鮮六月詔曰甘泉宮
內中產芝九莖連葉上帝博臨不異下房朕弘休
其赦天下賜雲陽都百戶牛酒作芝房之歌秋作明
堂於泰山下遣樓船將軍楊僕左將軍荀彘將應募
罪人擊朝鮮又遣將軍郭昌中郎將衛廣發巴蜀兵
平西南夷未服者以爲益州郡
三年春作角抵戲三百里內皆來觀夏朝鮮斬其王
右渠降以其地爲樂浪臨屯元菟真番郡樓船將軍
楊僕坐失亡多免爲庶民左將軍荀彘坐爭功棄市
秋七月膠西王端薨武都氏人反分徙酒泉郡

四年冬十月行幸雍祠五時通回中道遂北出蕭關
歷獨鹿鳴澤自代而還幸河東春三月祠后土詔曰
朕躬祭后土地祇見光集於靈壇一夜三燭幸中都
宮殿上見光其赦汾陰夏陽中都死罪以下賜三縣
及楊氏皆無出今年租賦夏大旱民多暵死秋以匈
奴弱可遂臣服遇遣使說之單于使來死京師匈奴
寇邊遣拔胡將軍郭昌屯朔方

五年冬行南巡狩至於盛唐望祀虞舜於九嶷登瀟
天柱山自尋陽浮江親射蛟江中獲之舳艫千里薄
縱陽而出作盛唐樅陽之歌遂北至琅邪並海所過
禮祠其名山大川春三月還至太山增封甲子祠高
祖於明堂以配上帝因朝諸侯王列侯受郡國計夏
四月詔曰朕巡荆揚輯江淮物會大海氣以合泰山
上天見象增修封禪其赦天下所幸縣毋出今年租
賦賜鰥寡孤獨帛貧窮者粟還幸甘泉郊泰時大司
馬大將軍青薨初置刺史部十三州名臣文武欲盡
詔曰蓋有非常之功必待非常之人故馬或奔蹏而
致千里士或有負俗之累而立功名夫泛駕之馬跡
弛之士亦在御之而已其令州郡察吏民有茂材異
等可爲將相及使絕國者

六年冬行幸回中春作首山宮三月行幸河東祠后
土詔曰朕禮首山昆田出珍物化或爲黃金祭后土
神光三燭其赦汾陰殊死以下賜天下貧民布帛人
一匹益州昆明反赦京師亡命令從軍遣拔胡將軍
郭昌將以擊之夏京師民觀角抵於上林平樂館秋
大旱蝗

太初元年冬十月行幸泰山十一月甲子朔旦冬至

祀上帝於明堂乙酉柏梁臺災十二月禮高里祠后
土東臨勃海望祠蓬萊春還受計於甘泉二月起建
章宮夏五月正歷以正月爲歲首色上黃數用五定
官名協音律遣因杆將軍公孫敖築塞外受降城秋
八月行幸安定遣貳師將軍李廣利發天下謫民西
征大宛蝗從東方飛至敦煌

二年春正月戊申丞相慶薨三月行幸河東祠后土
今天下大酺五日腰五日祠門戶比臘夏四月詔曰
朕用事介山祭后土皆有光應其赦汾陰安邑殊死
以下五月籍吏民馬補車騎馬秋蝗遣浞稽將軍趙
破奴二萬騎出朔方擊匈奴不還冬十二月御史大
夫兒寬卒

三年春正月行東巡海上夏四月還修封泰山禮石
闕遣光祿勳徐自爲築五原塞外列城西北至盧朐
游擊將軍韓說將兵屯之強弩都尉路博德築居延
秋匈奴入定襄雲中殺略數千人行壞光祿諸亭障
又入張掖酒泉殺都尉

四年春貳師將軍廣利斬大宛王首獲汗血馬來作
西極天馬之歌秋起明光宮冬行幸回中徙弘農都
尉治武關稅出入者以給關吏卒食

天漢元年春正月行幸甘泉郊泰時三月行幸河東
祠后土匈奴歸漢使者使使來獻夏五月赦天下秋
閉城門大搜發謫戍屯五原

二年春行幸東海還幸回中夏五月貳師將軍三萬
騎出酒泉與右賢王戰於天山斬首萬餘級又遣因
杆將軍出西河騎都尉李陵將步兵五千人出居延
北與單于戰斬首萬餘級陵兵敗降匈奴秋止禁巫

祠道中者大搜渠黎六國使使來獻泰山琅邪羣盜徐牧等阻山攻城道路不通遣直指使者暴勝之等衣繡衣杖斧分部逐捕刺史郡守以下皆伏誅冬十一月詔關都尉曰今豪桀多遠交依東方羣盜其謹察出入者

三年春二月御史大夫王卿有罪自殺初權酒酤三月行幸泰山修封祀明堂因受計還幸北地祠常山瘞元玉夏四月赦天下行所過毋出田租秋匈奴入鴈門太守坐畏懷棄市

四年春正月朝諸侯王於甘泉宮發天下七科謫及勇敢士遣貳師將軍李廣利將六萬騎步兵七萬人出朔方因杆將軍公孫敖萬騎步兵三萬人出鴈門游擊將軍韓說步兵二萬人出五原強弩都尉路博德步兵萬餘人與貳師會廣利與單于戰余吾水上連日敖與左賢王戰不利皆引還夏四月立皇子髡為昌邑王秋九月令死罪人贖錢五十萬減死一等太始元年春正月因杆將軍赦有罪要斬徙郡國吏民豪傑於茂陵雲陵夏六月赦天下

二年春正月行幸回中三月詔曰有司議曰往者朕郊見上帝西登隴首獲白麟以饋宗廟渥洼水出天馬泰山見黃金宜改故名今更黃金為麟趾裏蹏以協瑞焉因以班賜諸侯王秋早九月募死罪人贖錢五十萬減死罪一等御史大夫杜周卒

三年春正月行幸甘泉宮饗外國客二月令天下大酺五日行幸東海獲赤雁作朱雁之歌幸琅邪禮日成山登之罘浮大海山稱萬歲冬賜行所過戶五千錢餼寡孤獨帛人一匹

四年春三月行幸泰山壬午祀高祖於明堂以配上帝因受計癸未祀孝景皇帝於明堂甲申修封丙戌禮石閭夏四月幸不其祠神人於交門宮若有鄉坐拜者作交門之歌夏五月還幸建章宮大置酒赦天下秋七月趙有蛇從郭外入邑與邑中蛇羣鬪孝文廟下邑中蛇死冬十月甲寅晦日有蝕之十二月行幸雍祠五時西至安定北地

征和元年春正月還行幸建章宮三月趙王彭祖薨冬十一月發三輔騎士大搜上林閉長安城門索十一日迺解巫蠱起

二年春正月丞相賀下獄死夏四月大風發屋折木閏月諸邑公主陽石公主皆坐巫蠱死夏行幸甘泉秋七月按道侯韓說使者江充等掘蠱太子宮壬午太子與皇后謀斬充以節發兵與丞相劉屈氂大戰長安死者數萬人庚寅太子亡皇后自殺初置城門屯兵更節加黃旆御史大夫暴勝之司直田仁坐失縱勝之自殺仁要斬八月辛亥太子自殺於湖癸亥地震九月立趙敬肅王子偃為平王匈奴入上谷五原殺略吏民

三年春正月行幸雍至安定北地匈奴入五原酒泉殺兩都尉三月遣貳師將軍廣利將七萬人出五原御史大夫商丘成二萬人出西河重合侯馬通四萬騎出酒泉成至浚稽山與虜戰多斬首通至天山虜引去因降車師皆引兵還廣利敗降匈奴夏五月赦天下六月丞相屈氂下獄要斬妻子梟首秋蝗九月反者公孫勇胡倩發覺皆伏辜四年春正月行幸東萊臨大海二月丁酉隕石於雍

二聲聞四百里三月上耕於鉅定還幸泰山修封庚寅祀於明堂癸巳禮石閭夏六月還幸甘泉秋八月辛酉晦日有蝕之

後元元年春正月行幸甘泉郊泰時遂幸安定昌邑王薨二月詔曰朕郊見上帝巡於北邊見羣鶴留止以不羅罔靡所獲獻薦於泰時光景並見其赦天下夏六月御史大夫商丘成有罪自殺侍中僕射莽何羅與弟重合侯通謀反侍中駙馬都尉金日磾奉車都尉霍光騎都尉上官桀討之秋七月地震往往湧泉出

二年春正月朝諸侯王於甘泉宮賜宗室二月行幸盤屋五柞宮乙丑立皇子弗陵為皇太子丁卯帝崩於五柞宮入殯於未央宮前殿三月甲申葬茂陵贊曰漢承百王之弊高祖撥亂反正文景務在養民至於稽古禮文之事猶多闕焉孝武初立卓然罷黜百家表章六經遂疇咨海內舉其俊茂與之立功興太學修郊祀改正朔定曆數協音律作詩樂建封禪禮百神紹周後號令文章煥焉可述後嗣得遵洪業而有三代之風如武帝之雄材大略不改文景之恭儉以濟斯民雖詩書所稱何有加焉

欽定古今圖書集成明倫彙編皇極典

第十四卷目錄

帝紀部彙考八

漢四

昭帝

宣帝

皇極典第十四卷

帝紀部彙考八

漢四

昭帝本紀

按漢書昭帝本紀孝昭皇帝武帝少子也母曰趙婕妤本以有奇異得幸及生帝亦奇異語在外戚傳武帝末戾太子敗燕王旦廣陵王胥行驕嫚後元二年二月上疾病遂立昭帝為太子年八歲以侍中奉車都尉霍光為大司馬大將軍受遺詔輔少主明日武帝崩戊辰太子即皇帝位謁高廟帝姊鄂邑公主益湯沐邑為長公主共養省中大將軍光秉政領尚書事車騎將軍金日磾左將軍上官桀副焉夏六月赦天下秋七月有星孛于東方濟北王寬有罪自殺賜長公主及宗室昆弟各有差追尊趙婕妤為皇太后起雲陵冬匈奴入朔方殺略吏民發軍屯河西左將軍桀行北邊
始元元年春二月黃鵠下建章宮太液池中公卿上壽賜諸侯王列侯宗室金錢各有差已亥上耕於鉤

盾弄田益封燕王廣陵王及鄂邑長公主各萬三千戶夏為太后起園廟雲陵益州廉頭姑繒牂牁談指同並二十四邑皆反遣水衡都尉呂破胡募吏民及發犍為蜀郡奔命擊益州大破之有司請河內屬冀州河東屬并州秋七月赦天下賜民百戶牛酒大雨渭橋絕八月齊孝王孫劉澤謀反欲殺青州刺史雋不疑發覺皆伏誅遷不疑為京兆尹賜錢百萬九月丙子車騎將軍日磾薨閏月遣故廷尉王平等五人持節行郡國舉賢良問民所疾苦冤失職者冬無冰二年春正月大將軍光左將軍桀皆以前捕斬重合侯馬通功封光為博陸侯桀為安陽侯以宗室母在位者舉茂材劉辟疆劉長樂皆為光祿大夫辟疆守長樂衛尉二月遣使者振貸貧民毋種食者秋八月詔曰往年災害多今年蠶麥傷所振貸種食勿收責毋令民出今年田租冬發習戰射士詣朔方調故吏將屯田張掖郡

三年春二月有星孛于西北秋募民徙雲陵賜錢田宅冬十月鳳皇集東海遣使者祠其處十一月壬辰朔日有蝕之

四年春三月甲寅立皇后上官氏赦天下辭訟在後二年前皆勿聽治夏六月皇后見高廟賜長公主丞相將軍列侯中二千石以下及郎吏宗室錢帛各有差徙三輔富人雲陵賜錢戶十萬秋七月詔曰比歲不登民匱於食流庸未盡還往時令民共出馬其止勿出諸給中都官者且減之冬遣大鴻臚田廣明擊益州廷尉李种坐故縱死罪棄市
五年春正月追尊皇太后父為順成侯夏陽男子張

延年詣北闕自稱衛太子誣罔要斬夏罷天下亭母馬及馬弩關六月封皇后父驃騎將軍上官安為桑樂侯詔曰朕以眇身獲保宗廟戰戰栗栗夙夜寐修古帝王之事通保傳傳孝經論語尚書未云有明其令三輔太常舉賢良各二人郡國文學高第各一人賜中二千石以下至吏民爵各有差罷儋耳真番郡秋大鴻臚廣明軍正王平擊益州斬首捕虜三萬餘人獲畜產五萬餘頭

六年春正月上耕於上林二月詔有司問郡國所舉賢良文學民所疾苦議罷鹽鐵榷酤核中監蘇武前使匈奴雷單于庭十九歲還還奉使全節以武為典屬國賜錢百萬夏旱大雩不得舉火秋七月罷榷酤官令民得以律占租賣酒升四錢以邊塞闊遠取水隴西張掖郡各二縣置金城郡詔曰鈞町侯毋波率其君長人民擊反者斬首捕虜有功其立毋波為鈞町王大鴻臚廣明將率有功賜爵關內侯食邑元鳳元年春長公主共養勞苦復以藍田益長公主湯沐邑酒水戴王前薨以母嗣國除後宮有遺腹子媛相內史不奏言上聞而憐之立媛為泗水王相內史皆下獄三月賜郡國所選有行義者涿郡韓福等五人帛人五十匹遣歸詔曰朕聞勞以官職之事其務修孝弟以教鄉里令郡縣常以正月賜羊酒有不幸者賜衣被一襲祠以中牢武都氏人反遣執金吾馬適建龍額侯韓增大鴻臚廣明將三輔太常徒皆免刑擊之夏六月赦天下秋七月乙亥晦日有蝕之既八月改始元為元鳳九月鄂邑長公主燕王旦與左將軍上官桀子驃騎將軍安御史大夫桑弘羊

皆謀反伏誅初桀安父子與大將軍光爭權欲害之詐使人為燕王旦上書言光罪時上年十四覺其詐後有譖光者上輒怒曰大將軍國家忠臣先帝所屬敢有譖毀者坐之光由是得盡忠語在燕王霍光傳冬十月詔曰左將軍安陽侯桀驕驕將軍桑落侯安御史大夫桑弘羊皆數以邪枉干輔政大將軍不聽而懷怨望與燕王通謀置驛往來相約結燕王遣壽西長孫縱之等賂遺長公主下外人謁者杜延年大將軍長史公孫遺等交通私書共謀令長公主置酒伏兵殺大將軍光徵立燕王為天子大逆母道故稻田使者燕倉先發覺以告大司農敞敞告諫大夫延年延年以聞丞相徵事任宮手捕斬桀丞相少史王壽誘將安入府門皆已伏誅吏民得以安封延年倉官壽皆為列侯又曰燕王迷惑失道前與齊王子劉澤等為逆抑而不揚望王反道自新今適與長公主左將軍桀等謀危宗廟王及公主皆自伏辜其赦王太子建公主子文信及宗室子與燕王上官桀等謀反父母同產當坐者皆免為庶人其吏為桀等所誣誤未發覺在吏者除其罪

二年夏四月上自建章宮徙未央宮大置酒賜郎從官帛及宗室子錢人二十萬吏民獻牛酒者賜帛人一匹六月赦天下詔曰朕聞百姓未贖前年減漕三百萬石願省乘輿馬及苑馬以補邊郡三輔傳馬其令郡國毋斂今年馬口錢三輔太常郡得以叔粟當賦

三年春正月泰山有大石自起立上林有柳樹枯僵自起生罷中牟苑賦貧民詔曰遇者民被水災願置

於食朕虛倉廩使使者振困乏其止四年毋漕三年以前所振貸非丞相御史所請邊郡受牛者勿收責夏四月少府徐仁廷尉王平左馮翊賈勝胡皆坐縱反者仁自殺平勝胡皆要斬冬遼東烏桓反以中郎將范明友為度遼將軍將北邊七郡都二千騎擊之四年春正月丁亥帝加元服見於高廟賜諸侯王丞相大將軍列侯宗室下至吏民金帛牛酒各有差賜中二千石以下及天下民爵母收四年五年口賦三年以前逋更賦未入者皆勿收今天下酺五日甲戌丞相千秋薨夏四月詔曰度遼將軍明友前以羌騎校尉將羌王侯君長以下擊益州反寇後復率擊武都反氏今破烏桓斬復有功其封明友為平陵侯平樂監傳介子持節使誅斬樓蘭王安歸首縣北關封義陽侯五月丁丑孝文廟正殿火上及羣臣皆素服發中二千石將五校作治六日成太常及廟令丞郎吏皆劾大不敬會赦太常轅陽侯德免為庶人六月赦天下

五年春正月廣陵王來朝益國萬一千戶賜錢二十萬黃金二百斤劔二安車一乘馬二駟夏大旱六月發三輔及郡國惡少年吏有告劾亡者屯遼東秋罷象郡分屬鬱林牂牁冬十一月大雷十二月庚戌丞相訢薨六年春正月募郡國徒樂遼東元菟城夏赦天下詔曰夫穀賤傷農今三輔太常穀減賤其令以叔粟當今年賦右將軍張安世宿衛忠謹封富平侯烏桓復犯塞遣度遼將軍范明友擊之元平元年春二月詔曰天下以農桑為本日者省用

罷不急官減外繇耕桑者益眾而百姓未能家給朕甚愍焉其減口賦錢有司奏請減什三上許之甲申晨有流星大如月衆星皆隨西行夏四月癸未帝崩於未央宮六月壬申葬平陵贊曰昔周成以孺子繼統而有管蔡四國流言之變孝昭幼年即位亦有燕蓋上官逆亂之謀成王不疑周公孝昭委任霍光各因其時以成名大矣哉承孝武奢侈餘敝師旅之後海內虛耗戶口減半光知時務之要輕繇薄賦與民休息至始元元鳳之間匈奴和親百姓充實舉賢良文學問民所疾苦議鹽鐵而罷榷酤尊號曰昭不亦宜乎

宣帝本紀按漢書宣帝本紀孝宣皇帝武帝曾孫戾太子孫也太子納史良娣生史皇孫皇孫納王夫人生宣帝號曰皇曾孫生數月遭巫蠱事太子良娣皇孫王夫人皆遇害語在太子傳曾孫雖在襁褓猶坐收繫郡邸獄而丙吉為廷尉監治巫蠱於郡邸憐曾孫之亡辜使女徒復作淮陽趙徵卿渭城胡組更乳養私給衣食視遇甚有恩巫蠱事連歲不決至後元二年武帝疾往來長楊五柞宮望氣者言長安獄中有天子氣

上遣使者分條中都官獄繫者輕重皆殺之內謁者令郭穰夜至郡邸獄吉拒閉使者不得入會孫賴吉得全因遭大赦吉遇載會孫送祖母史良娣家語在吉及外戚傳後有詔掖庭養視上屬籍宗正時掖庭令張賀嘗事戾太子思顧舊恩哀會孫奉養甚謹以私錢供給教書既壯為取暴室膏夫許廣漢女會孫因依倚廣漢兄弟及祖母家史氏受詩於東海濱中翁高材好學然亦喜游俠闖難走馬具知閭里姦邪吏治得失數上下諸陵周徧三輔常困於運勾鹵中尤樂杜鄆之間率常在下杜時會朝請舍長安尚冠里身足下有毛臥居數有光耀每買餅所從買家輒大難亦以是自怪元平元年四月昭帝崩母舅大將軍霍光請皇后徵昌邑王六月丙寅王受皇帝璽綬尊皇后曰皇太后癸巳光奏王賀淫亂請廢語在賀及光傳秋七月光奏議曰禮人道親親故尊祖尊故敬宗太宗無嗣擇支子孫賢者為嗣孝武皇帝會孫病已有詔掖庭養視至今年十八師受詩論語孝經操行節儉慈仁愛人可以嗣孝昭皇帝後奉承祖宗子萬姓奏可遣宗正德至會孫尚冠里舍洗沐賜御府衣太僕以輪獵車奉迎會孫就齊宗正府庚申入未央宮見皇太后封為陽武侯已而羣臣奏上璽綬即皇帝位謁高廟八月己巳丞相敞薨九月大赦天下十一月壬子立皇后許氏賜諸侯王以下金錢至吏民鰥寡孤獨各有差皇太后歸長樂宮長樂宮初置屯衛

本始元年春正月募郡國吏民嘗百萬以上徙平陵遣使者持節詔郡國二千石謹牧養民而風德化大

將軍光稽首歸政上謙讓委任焉論定策功益封大將軍光萬七千戶車騎將軍光祿勳富平侯安世萬戶詔曰故丞相安平侯敞等居位守職與大將軍光車騎將軍安世建議定策以安宗廟功實未加而薨其益封敞嗣子忠及丞相陽平侯義度遼將軍平陵侯明友前將軍龍雛侯增太僕建平侯延年太常蒲侯昌諫大夫宜春侯譚當塗侯平杜侯屠耆堂長信少府關內侯勝邑戶各有差封御史大夫廣明為昌水侯後將軍充國為營平侯大司農延年為陽城侯少府樂成為爰氏侯光祿大夫遷為平丘侯賜右扶風德典屬國武廷尉光宗正德大鴻臚賢詹事畸光祿大夫吉京輔都尉廣漢爵皆關內侯德武食邑夏四月庚午地震詔內郡國舉文學高第各一人五月鳳皇集膠東千乘赦天下賜吏二千石諸侯相下至中都官宦吏六百石爵各有差自左更至五大夫賜天下人爵各一級孝者二級女子百戶牛酒租稅勿收六月詔曰故皇太子在湖未有號諡歲時祠其議諡置園邑語在太子傳秋七月詔立燕刺王太子建為廣陽王立廣陵王胥少子弘為高密王

二年春以水衡錢為平陵徙民起第宅大司農陽城侯田延年有罪自殺夏五月詔曰朕以眇身奉承祖宗夙夜惟念孝武皇帝躬履仁義選明將討不服匈奴遠遁平氏羌昆明南越百蠻鄉風款塞來享建太學修郊祀定正朔協音律封泰山塞宣房符瑞應寶鼎出白麟獲功德茂盛不能盡宣而廟樂未稱其議奏有司奏請宜加尊號六月庚午尊孝武廟為世宗廟奏盛德文始五行之舞天子世世獻武帝巡狩所

幸之郡國皆立廟賜民爵一級女子百戶牛酒匈奴數侵邊又西伐烏孫烏孫昆彌及公主因國使者上書言昆彌願發國精兵擊匈奴唯天子哀憐出兵以救公主秋大發興調關東輕車銳卒選郡國吏三百石伉健習騎射者皆從軍御史大夫田廣明為祁連將軍後將軍趙充國為蒲類將軍雲中太守田順為虎牙將軍及度遼將軍范明友前將軍韓增凡五將軍兵十五萬騎校尉常惠持節護烏孫兵威擊匈奴三年春正月癸亥皇后許氏崩戊辰五將軍師發長安夏五月軍罷祁連將軍廣明虎牙將軍順有罪下有司皆自殺校尉常惠將烏孫兵入匈奴右地大克獲封列侯大早郡國傷旱甚者民毋出租賦三輔民就賤者且毋收事盡四年六月己丑丞相義薨

四年春正月詔曰蓋聞農者與德之本也今歲不登已遣使者振貸困乏其令太官損膳省宰樂府減樂人使歸就農業丞相以下至都官令丞上書入穀輸長安倉助貸貧民以車船載穀入關者得毋用傳二月乙卯立皇后霍氏賜丞相以下至郎吏從官金錢帛各有差赦天下夏四月壬寅郡國四十九地震或山崩水出詔曰蓋災異者天地之戒也朕承洪業奉宗廟託於士民之上未能和羣生迺者地震北海琅邪壞祖宗廟朕甚懼焉丞相御史其與列侯中二千石博問經學之士有以應變輔朕之不逮毋有所諱令三輔太常內郡國舉賢良方正各一人律令有可蠲除以安百姓條奏被地震壞敗甚者勿收租賦大赦天下上以宗廟墮素服避正殿五日五月鳳皇集北海安丘淳于秋廣川王吉有罪廢遷上庸自殺